

Un cuerda musical a cay den nos mundo di musica

Awe Aruba ta hiba pa su ultimo lugar d sosiego, un di e musiconan mas grand cu nos isla a conoce. **Mario "Mai" Bislick.**

Den mundo musical di Aruba, delaster un musico sa kende ta Mario Bislick, y con grandi e tabata, pero como figura musical, masha poco e tabata bin den publicidad.

E nunca tabata gusta bin den publicidad y mantene su mes aleha di esaki, y semper tabata cla pa yuda y duna un man na tur musico, sin distincion, y sin nunca muestra **"e maestro"** o **"profesional"** cu e ta.

Mario Bislick a bay laga nos sin por a cumpli cu e dos deseonan grandi cu e tabata tin.

Un tabata pa presenta un concierto di musica clasica y e otro di forma un coro di familia.

Un gran personahe, amigo di tur hende, cariñoso, respetable, cu gran sentido di humor y humilde cu un y tur.

SU INSPIRACION TABATA RACHMANINOV

Tempo cu e tabata hoben, Mario Bislick a mirà un pelicula den cual musica di Sergei Rachmaninov a ser toca.

E tabata asina encanta cu e musica di piano aki, y a papia cu su mama, indicando cu e kier bay studia musica na Hulanda.

Su tata a bay di acuerdo tambe, y Mario a viaha pa Hulanda y a studia musica na Conservatorio di Amsterdam.

Mario tabata ensaya 6 pa 8 ora pa dia riba piano.

El a bira e prome arubano cu estudio di conservatorio y musica di Rachmaninov nunca el a laga un banda.

Algun aña atras el a practica hopi tur mainta na Cas di Cultura pa por presenta un concierto di musica clasica.

Rachmaninov tabata su inspiracion y **"Piano Concierto nr. 3"**, **"Rhapsody on the theme of Paganini"**, tambe **"Symphonic Dances"** tabata den su repertorio practica.

Pero ultimo añanan su pasion a cambia pa musica di Jazz cu el a considera di ta mas grandi cu musica clasica. El a bira pasiona cu jazz.


HOPI BANDA A PROBECHA DI DJE

Mario Bislick den su hubentud, prome cu el a bay Merca, a toca pa entre otro Caribbean Ambassadors, cu Rio Rita, Casino del Caribe, Habana Boys, y tambe cu Nueva Sensacion, un periodo cu Sensacion musical y algun aña pasa, for di 1989 te cu 1994 el a toca cu **"Sound of class"**.

Un periodo e tabata tambe dirigente di Los Duques, despues cu Toty Arends a bai biba den exterior.

Mario Bislick a dirigi y yuda varios coro riba nos isla, y tabata director tambe di Orquesta Harmonica di nos isla, den cual orquesta tambe el a toca.

Ademas di piano, Mario Bislick tabata toca Clarinet, Saxophone, dwarsfluit y steelpan.



El a toca den casi tur hotel di nos isla como pianista. Hunto cu Toty Arends e tabata toca tambe den Bali Bar (The floating Restaurant) na waf di nos isla.

Durante cu el a biba na Merca el a toca cu dos **"Big Band"** america no, un di 18 y un di 16 musico profesional di renombre y ademas a toca na hopi ocasion

pa festividadnan Antiyano y di Arubianonan, cu e banda **"Aruba Road Band"** cu entre otro Simeon Brian, Elsie Pieters, Foncito Gibbs, William Baly entre otro.

Na Merca e tabata tambe maestro di les di musica y hopi ta esnan cu a gradua na su man.

Mario Bislick a graba varios cancion riba label Caribia cu composicionnan di Toty Arends, y e tabata pianista tambe pa e gran cantante di tango cu Aruba a conoce, Taly Lopez.

Mario na principio di decada 60 tabata pianista di e grupo vocal 4 Diamonds, (the 4 D's) cu Freddy Dirks, Gilbert do Matos, Wichy de Palm y Rudy Mc Donald.

Un grupo vocal cu te awe Aruba no a conoce su igual riba nos isla y cu tabata di nivel internacional.

Mario Bislick, condecora como miembro di Oranje Nassau awe sigur lo haya un despedida musical cu Orquesta Harmonica y Orquesta Funebre, tur musico di e orquestanan aki, coleganan y amigonan musical cu lo haya hopi falta di nan **"maestro"** grandi, pero cu semper lo mantene Mai den nan memoria, pa e grandi cu Mario Bislick tabata den mundo musical di nos isla.

Un cuerda musical a cay cu fayecimento di Mario **"Mai" Bislick**, pero na su lugar, el a laga hopi cuerda mas y otronan cu lo bisa: **"Mi tambe kier ta un profesional y maestro, manera Mario Bislick."**

Juby Naar

